



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail: tiryimiyim@gmail.com

TAPAK 7

Yangia anidakangma :



Tir Yimiyim



tir_yimiyim




tir yimiyim

TAPAK 7

Lahore nung LeT co-founder Amir Hamza dak akha

S-Iran sensaksem atema Pakistan PM, army tekolakba nati linük balala semdang



VOL. XXIII ISSUE NO. 185 (ADOK 185) DIMAPUR AMUNGNÜ (SUNDAY) RONGCHII (APRIL) 19, 2026

₹ 5.00

Apr 24, 2026 nü HSLC & HSSLC results adoktsü

Dimapur, April 18, 2026 (TYO): Nagaland Board of School Education (NBSE)-i April 24, 2026 nü the HSLC aser HSSLC examinations 2026 indang results sangdongtsü.

NBSE nung register süa aliba rejutem nem Result Gazettes den Mark Sheets/Pass Certificates agütsütsü aser NBSE Portal www.nbsenl.edu.in nung soft copy angutsü.

Maneni, www.nbsenl.edu.in; www.jagranjosh.com; www.indiaresults.com; www.schools9.com; www.results.shiksha nunga results angutsü.

Külen, www.nbsenl.edu.in; www.indiaresults.com; www.results.shiksha ajanga marks/Marksheet download asütsü akok ta NBSE-i metetdaksüogo.

NBSE Portal www.nbsenl.edu.in nunga Migration Certificate download sütettsü aser playstore nung Android Mobile result app

angutsü ta parnokisa ashi.

May 1 nungi 5, 2026 tashi NBSE-i Centre Superintendents nem Documents agütsütsü. Ibaji parnoki pa/la kübok Centre nung aliba school tem nem lema agütsütsü. Centre Superintendent kar kodamasüba agi marutettsüsa kümra pa/lai tanga Centre Superintendent ka nem agizütsü tashi agütsütsü akok ta NBSE-isa metetdaksüogo.

Taküm Higher Secondary School Leaving Certificate (HSSLC) Examination nung kaketshir 16,096 liasü aser parnoki examination centres 68 nung tatidang agütsüogo.

HSSLC kaketshirtemji Arts nungi 11,824, Commerce nungi 1,181 aser Science stream nungi 3,091 lir.

Külen HSLC examination agütsür kaketshir ajak agi 23,504 lir aser iba nung compartmental candidates 739 densema lir.

Parnoki examination centres 98 nung tatidang agütsü aser asüng iba indang results adoktsü.

Dr. Belho's Hospital nung Intrauterine Insemination (IUI) clinic amenoker

Dimapur, April 18, 2026 (TYO): Dr. Belho's Hospital, Dimapur nung Nova IVF Centre ajanga Intrauterine Insemination (IUI) clinic lapokgogo.

Iba Intrauterine Insemination (IUI) clinic ajanga Nagaland aser temeket nung fertility care tajungba akümtsü.

"Iba facility tasenba ajanga Nagaland nung alir nem advanced, affordable aser accessible fertility treatment bentsür arur" ta Nova IVF Fertility, Chief Consultant Dr. Mujibur Rahman-i ashi.

"Tanü tashi apuani aikati IUI amala basic fertility treatments atema Guwahati ama meta talangi

aotsüsa akümer aser iba nung timtem aika ajurur" ta Dr. Mujibur-i ashi.

Dr. Belho's Hospital, Dimapur nung iba clinic lapokba ajanga high-quality fertility services angutsü. Iba centre nung modern technology bendenloktsü aser trained specialists ajanga teyari agütsütsü ta paisa metetdaksü.

Iba mapa nung Dr. Belho's Hospital-i host institution ama asütsü aser medical services den fertility care sendakteptsü. Iba tesentaktep ajanga Northeast region nung infertility care gaps koktetsü aser külemi ajak asoshi high-quality healthcare mangdang ataloktsü.

Nagaland nungi prangpong shibelenba atema NIA-i Bihar nung ka aitsür

Guwahati, April 18, 2026 (Agencies): Nagaland nungi ozüng alema prangpong-injang alizüker Naxal teloktem aser ozüng alema inyaker nem agütsüba atema National Investigation Agency (NIA)-i Bihar nung ka anema chargesheet benokogo.

Iba nisung ya Muzaffarpur nungi Kundan Kumar (Kundan Bhagat) lir aser Patna nung special NIA court ka tsüngdang chargesheet benokogo.

Bihar Police-i November 2025 nung pa ket nungi AK-47 rifle ka, magazine ka aser injangtem bena aliba putetba sülen pa apu.

Kumar-i 2025 nungi Nagaland nungi prangpongtem alizük aser shibelen ta NIA-i ashi.

Prangpong-injangtemji Naxal teloktem aser Bihar nung ozüng alema inyaksangshir nem agütsü ta bushisüngdanga arudang bushitetogo.

NIA-i inter-state arms trafficking network ka atema bushisüngdanga aruba den iba ken o ya sendaktepa lir. Tesüiba nung NIA-i tai tonglokja alir nisung pezü-Vikash Kumar, Devmani Rai, Satyam Kumar aser Ahmad Ansari nung anema chargesheet benoka lir.

Ukhrul nung Tangkhul Naga nung 3 tepsetba ken o NIA nem agütsür

Imphal/Ukhrul, April 18, 2026 (Agencies): Ukhrul district kübok T M Kasom yimtsüng nung civilian tem amakba ken o National Investigation Agency (NIA) ket nung agütsütsü asoshi Manipur sorkari telemtetba agiogo.

Honibarnü atalokba lendong nung Tangkhul Naga nung asem tashi tepset aser Kuki telungpurtemi inyak ta temlung meleme bilemer.

Tanü nikongdang tashi nung tasür nisung asem aküm ta ketdangsürtemi ashi. Mezüng asüba mang anaji post-mortem examination atema Ukhrul District Hospital nung yua lir ta parnokisa shisem.

Ukhrul district kübok T.M. Kasom yimtsüng nung telungpurtemi civilian tem tepsetba aitsür ta Manipur sorkari metetdaksüogo.

Iba tatalokba ajanga yimjung aser lokti putepa alitsü maparen inyakba nung tetsükdaksü tulu ka bentsür aruogo.

April 18, 2026 nikongdang 2:30 meta telungpurtemi Imphal-Ukhrul road nung gari pungu dak injang khaloktsü ta ketdangsürtemi ashi.

"Iba tatalokba atema Litan Police Station nung ken o ka benokogo aser bushisüngdang südar. Iba ken o ya National

Investigation Agency (NIA) ket nung agütsütsü" ta tanü Chief Minister Yumnam Khemchand Singh-i shia liasü.

"Civilian tem amakba ya tesempatsü aser lapi mapa ka lir. Shia meteterem aliba loktiliba ka nung ibala mapa magizüker" ta pai ashi.

Iba mapa inyakerem pua arutsü aser merenshitsu atema security forces-i mapa tenzükogo ta CM Khemchand-isa ashi.

Chief Minister Khemchand aser Home Minister Govindas Konthoujam nati tensa reprangdar aser security arrangements meyipa reprangshitsu atema senden ka ayonga menogo.

Home Minister Konthoujam-i public dang iba mapa inyakerem pua arutsü asoshi security forces den yariteptsü mepishia metetdaksüogo.

Tangkhul Naga Long (TNL) nung Working Committee-ia Yaolen Kuki yimtsüng anasa civilian tem amakba aitsüba metetdaksüogo.

TRONGLAOBI BOMBATEMA ANOGO 5 MOKDANGER

Külen, Tronglaobi bomb amakba atema temeten meshia Deobar nungi tenzük anogo pungunü tashi Manipur ajanga mokdangtsü ayongzükogo.

Iba sentong ya Meira Paibis, civil society organizations aser Tronglaobi bomb lendong sülen tentetba Joint Action Committee (JAC) ajanga ayongzük.

Iba tatalokba aitsüba aser mapa inyaksü rongshia state ajunga mokdang ta Meira Paibi lennir Chanambam Maipaktombi Devi-i ashi.

Parnokisa April 25 tashi nung ketdangsürtemi iba mapa inyaker ajak aputsü aser JAC-i akhangba onük ajak inyaksü mapang züngzüksüogo.

JAC-i akhangba onüktem rongnung iba mapa inyaker ajak aputsü, sepaitemi Kuki telungpur anema inyaksü, state forces-i central forces melenzüksü aser security units kari inyaksangshiba atema judicial inquiry asütsü dena lir.

P. Gelmon area nung aliba 8 Battalion CRPF aser Tronglaobi nung aliba 2 J&K Light Infantry Company ajanga mapa shitak meinyak ta JAC-i tai tongloktsür.

Tronglaobi bomb amakba lendong ya National Investigation Agency (NIA)-i bushisüngdanga arudar. Tawa tu Manipur Home Minister-i iba mapa nung shilem agi ta temlung meleme bilemba United Kuki National Army züngsem pungu pua lir ta metetdaksüogo.

Kohima nung Northeast Influencer Yatra agiogo



Dimapur, April 18, 2026 (TYO): India nung Northeast Influencer Yatra ajanga lanurtem aser tetsürtem asoshi maangka tasentem agütsür aser iba yatra ya April 17, 2026 nü Kohima nung agiogo.

Old NST, Kohima nung iba yatra ajanga Creators, Entrepreneurs aser Women nem tashi agütsüogo.

Oriflame ajanga tenzükba WhosThat360 North East Influencer Yatra ya India nung regional influencer campaigns tulutiba ka kumogo.

Iba yatra ya Shillong, Agartala, Aizawl aser Dimapur nung agiba sülen Old NST, Kohima nung takok ngua agiogo.

Maneni, Guwahati, Nagaon, Dibrugarh, Itanagar, Darjeeling, Siliguri, aser Durgapur nung agiba sülen Kolkata nung iba yatra tembangtsü.

Parnok anenzükba tesem shia nung kaketshirtem, beauty enthusiasts aser local influencers aikati shilem agir.

Talisa, iba yatra nung Oriflame Beauty and Wellness Partner Truck ajanga nisungtem atsür arur kechiyong iba nung adenertem product discovery sessions nung shilem agitsü maangka angur.

Oriflame Beauty and Wellness Partner Truck nung live beauty masterclasses, skincare workshops, aser creator

auditions alir.

Iba Yatra ya ajanga creators, kaketshirtem aser tetsürtem beauty, fashion, food, travel, wellness, aser lifestyle wadang balala nung tashi itdaksütsü meranger.

Oriflame indang Brand Partner Program ajanga shilem agirtemi pei businesses tenzüketer, senotsü aika aazük aser high-quality products ajungketa senotsü angur.

Oriflame ya 1967 küm tenzükba global beauty aser wellbeing company ka lir. Oriflame ya markets 60 tema nung lir aser alima nung Beauty Entrepreneurs million 3 tema nem tashi agütsür.

Eden Higher Secondary School kaketshirtemi Lok Bhavan semdang



Dimapur, Rongchii/April 18 (TYO): Eden Higher Secondary School, Dimapur nungi kaketshirtemi April 18 nü educational tour ka atema Lok Bhavan, Kohima semdangogo.

Iba anogo Angh Nand Kishore Yadav-i kaketshirtem den sensaksem sentong ka agia liasü. Sensaksem mapang kaketshirtemi lenisüba, yimsüsüba aser shisaluyim koda tongtibang iba dak sendakba nung tangazükba angu.

Sensaksema mapang Angh-i kaketshirtem aser lanurtem dang taküm nung takok angutsü atema meranga azüngtsü, meranga inyaksü aser peisasa dak tamang katettsü asoshi angazüktsü ajungshiba den meranga inyaksüba dak alaker tanga lenmang mali ta ashi.

Paisa, India Viksit Bharat 2047 leni aoba mapang Nagaland-a linük nung tanungba tesemtem den külemi renloka aotsüla, ta ashi.

Angh-i ashiba agi, sorkar mapa inyaksü ya dang lanurtem tejangraba masütsüla ta ashi. Iba melena lanurtemi entrepreneur akümtsü aser

paisasa purapiteta inyaksü atema ajungshitsüla ta ashi. Pai, tetsürtem ya teburtem den kasa dang ta shia state terenlok atema ajaki teyari agütsütsü ajungshia liasü.

Anghisa, technology ajanga akoksaba dak merangloki iba ajanga tajangzük bener arutsüba dak rangloker, iba ya asset ka ama shisa ka-a amshitsü koda tongtibang iba indang lemsatöp. Lokti tenzükba nung pa shilem indang jembiba mapang pai ashiba agi, kaketshirtem movement nung adentsü atema Jayaprakash Narayan-i pa ajungmeso aser iba sülen pa lokti tenzükba wadangi ayaoka ai. Paisa, lokti tenzüktsü atema tejangraba ya kangshia minoktsütettsü, saka peisasa mulungtetsüla, ta ashi. Lokti-i nüburtem nem maongka agütsür asünung nisung ajaki lokti nem meyipa agütsütsüla, ta pai ashi.

Maneni pai lanurtem dang pei nükjidong dak rangloksü aser temlungtetba tulu nung iba ya tongtettsü atema inyaksü ajungshi. Pai, tourism amala wadang nung Nagaland renloka aotsü lenmang sadema lapoka

lir, saka tangari state ya koda angateta lir iba ya melenshitsüla ta ashi.

Kaketshir ka asüba mapang pa tajangshibatem indang jembiba mapang Angh-i, par kinungertem nem konang tetushi bener arutsütsü atema pai bendanga agüja meranga inyaka liasü, ta ashi. Paisa, tetsükdaksü balala ajangshiba indang jembiba, saka temlungtetba tulu aliba ajanga item timtemtem ya kokteta aotsü asoshi teyari agüja liasü ta shisem.

Lok Bhavan semdangba ya kaketshirtem atema tajangshiba tajung ka liasü aser iba ajanga parnok ajungmesogo.

Kasa mapang nung Angh Nand Kishore Yadav-i April 18 nü Cathedral of Kohima (Mary Help of Christians Church) semdangogo. Pai iba tesem semdangba ajanga Nagaland loktiliba aser maitsü yanglutsüba riju ka akümtsüba sayur.

Cathedral semdangba mapang Angh-i yimjung, taremkük, shisaluyim aser lokti tenzükba nung tongtibang shilem agiba atema Arogo nem tenüngsang agütsü.

Dimapur Government College nung kuli kaket lemtsüba sentong agi



Dimapur, Rongchii/April 18 (TYO): Dimapur Government College nung April 18 nü Jewellery Designer Course aser Beauty & Wellness Course atema kuli kaket lemtsüba sentong ka ayongzuka agiogo.

Iba sentong ya Vocationalisation of Higher Education initiative kübok Skill Development Committee, DGC den longjemer PM-USHA Monitoring Cell, DGC-i ayongzuka agia liasü.

Jewellery Designer Course ya PM-USHA kübok Ministry of Education, Government of India-i senotsü teyari agüja agi, aser Beauty & Wellness Course atema Directorate of Higher Education, Government of Nagaland-i senotsü teyari agüja agiogo.

Sentong nung shilem agirtem rongnung Vice Principal, mentor-trainers, faculty aser DGC kaketshirtem densema liasü. Sentong ya Dr. Temjennaro Jamir, Asst. Professor, dept of

Mathematics lenisüba nung agi, shibai entrepreneurship ajungkettsü aser nisung ka mapa angutsü asoshi maongka taliba agütsütsü asoshi skill-based education ya koda tongtibang iba indang lemsatöp.

Jewellery Designer course trainee tem tenüng nung Ngungying M, BA 8th Semester, dept. of Economics-i o jembiba liasü. Lai, mentor-trainer Zabenthung Murry, Skill Development Committee, PM-USHA Monitoring Cell aser iba sentong nongita yariba staff tem dang parnoki len sayuba aser kaketshisatsü dak alaker tanga skill kar angazütsü asoshi maongka agütsüba atema pelaba lemsatöp. Lai, iba course ajanga entrepreneurial skills, brand development dak sendakba nung tangazükba agütsüogo, aser certified jewellery yanglur kaka ama renloka aotsü aser peisasa dak temlung lema akümtsü asoshi training nung shilem agirtem nem

teyari agütsüogo, ta ashi.

Kasa mapang nung Beauty and Wellness Course trainees tem tenüng nung Imsujungla Jamir, BA 4th Semester, dept. of English-i o tatsüka jembiba. Lai trainer Hukali Avito Swu dang kanga pelaba lemsatöp. Maneni lai külem training agirtem, ktdangsurtem, faculty, aser staff nung dang parnok teyari aser parnok nem iba maongka agütsüba atema kanga pelaba lemsatöp.

Kasa mapang nung DGC Vice Principal Dr. Meripeni Ngully-i, mentor-trainers ana nem tetushi agüja liasü. Iba sülen course takok ngua tembangba kaketshirtem nem kuli kaket agütsüba mapang agi. Dr. Ngully-i trainee tem nem tenüngsang agütsü aser tarutsü nung temaba jenjang tongtettsü atema meranga inyaksü ajungshia liasü.

Sentong ya Asst. Professor, dept. of Sociology Nungsangtola Walling-i tepela o jembir tembanga liasü.

Chumoukedima nung Census 2027 atema training agütsü

Dimapur, Rongchii/April 18 (TYO): Census 2027 dak sendakba nung anogo ana atema District aser Charge Officer training sentong ka April 18 nü Deputy Commissioner Office, Chumoukedima Conference Hall nung takok ngua tembangogo.

Sentong nung o jembiba mapang Chumoukedima Deputy Commissioner, Polon John, NCS-i, census atema mapa benoka inyakba mapang district nung tetsükdaksü aika ajangshitsü akok ta ashi. Paisa, iba inyakyim takok ngua benoka inyaksü atema ktdangsurtem ajak kati ka nongitpepa aser sendaktepa inyaksü nungdaker ta ashi.

Training tananübuba ya field-level implementation aser operational procedure tem dak rangloker agi. Training ya self-enumeration inyakyim, yimtsüng, jila aser charge register renemba, aser iba den census inyakyim, concept aser Maneni ktdangsurtem nem data jangja jangja aser shitak bendentsü atema Household

Listing Operations (HLO) questionnaire item dak sendakba nung tangazükba agütsü.

Iba den bendenloksema training nung shilem agirtem nem web portal aser mobile application ajanga District Census Handbook (DCHB) process dak sendakba nung tangazükba agütsü aser iba ajanga item digital hadirtem amshitsü atema parnok nem tangazükba agütsüogo.

Training sentong tatemi shilem agirtemi tangazükba tongtibatem lemsatöp aser Census 2027 takok ngua benoka inyaksü atema renema atatsü, sendaktepa inyaksü aser bendanga agüja inyaksü koda tongtibang iba indang lemsatöp.

Census inyakyim takok ngua benoktsü atema district-level administration shilem ya kanga tongtibang asütsü, ta ktdangsurtemi ashi. Parnokisa, pei office mapa den bendenloka iba mapa ya inyaksü lir ta shia stakeholder tem ajaki teka amteper inyaksü ayongzuka liasü.

Wokha DC Vineet Kumar den tepila sentong agi

Dimapur, Rongchii/April 18 (TYO): Mapa toktsüba Wokha Deputy Commissioner Vineet Kumar, IAS den pilaba aser Deputy Commissioner tasenba K. Mhathung Tsanglao, NCS, pela agizükba setong ka April 17 nü Wokha DC Conference Hall nung agiogo.

Tepila o jembiba mapang Vineet Kumar-i, Wokha nung alirtem dang parnok temeim aser pa tenure tepeyong pa nongita yariba atema kanga pelaba lemsatöp. Paisa, sorkar department balala, lokti tentet balala aser DC office staff temi teka amteper inyakba atema tenüngsang agütsüba den, longjemer inyakba ajanga mapa takok ngua inyaktetogo, ta ashi.

Paisa, Wokha district nungi legislator pezüprongla dang parnoki pa dang len sayuba aser pa nongita yariba atema pelaba lemsatöp aser Lotha nungertemi par kibong dang temeim sayuba atema-a pelaba lemsatöp.

Kumar-i ashiba agi, pa mapang tatsüka Wokha nung aliba ya teti menungra bilemtettsü. Maneni pai pa melenba DC tasenbai takok ngua tenzükettsü imlaja ataba lemsatöpba den bendanga agüja inyaksü ajungshia liasü.

Kasa mapang nung Deputy Commissioner tasenba, K. Mhathung Tsanglao shiba taoba mapang Meluri DC liasü, pai Vineet Kumar nem pa mapa tajung aser bendanga agüja inyakba atema tenüngsang agütsü aser pai district atema teyari agütsüba aser pa takok balala asoshi tenüngsang agüja liasü. Paisa, Wokha nung aliba nüburtemi Kumar mapa tajung

asir pai tatishitsü tajung toktsüba teti bilemtettsü ta ashi. Maneni Tsanglao-i, pa pelashishia agizükba atema pelaba lemsatöpba den Wokha nung aliba nüburtem nendak nendaka bendanga agüja tenzüktsü tenangzükba agütsü.

Paisa, Department tekolaktem, lokti tentet balala, stakeholder tem dang takok asoshi teka amteper inyaksü mepeshi aser district ajungkettsü aser terenlok atema pa bendanga agütsür aliba nenshia metetdaksü.

Sentong nungsa HODs Wokha tenüng nung ADC Headquarters Renbomo Ezung, ADC Bhandari Longasen, DPRO Wokha Lolano Patton, Chairman of Lotha Hoho Er. Mhondamo Ovung, Ministerial Staff representative Augustine Odyuo, Dobashi representative Mhabemo Murry, Lotha Officers Association (LOA) Wokha Unit representative Er. Benrithung Kithan, DFO Wokha Suman Shivashankar Sivachar, aser Medical Superintendent Wokha N. Mhonchan Kithan nungeri o tatsütsü jembiba liasü. O jembir ajaki Vineet Kumar-i teyari agütsüba indang lemsatöp aser DC tasenba pelashishia agizüka liasü.

Mapa toktsüba DC Vineet Kumar ya Additional Secretary, Finance and IDAN-i transfer süogo aser DC K. Mhathung Tsanglao-i Wokha district mapa agizükogo. Iba setong ya EAC Wokha, Sangmou Khamniungan lenisüba nung agi, shibai tepela o jembiba liasü.

Office of the DIMAPUR CHANGKI LONGCHAR KIDONG TELONGJEM,

Dimapur-797112, Nagaland.

Ref. Nil Date: 18.4.2026

TANABUBA AIENGER SEMCHIRTEM MENSEM AMENBA.

Oboula "Aienger shiba Oboula Longchenti nung jazük, Pa Semchirtem atenshia 17th April 2026 nü late N. Rongsen Ao kidang mensem ka ali. Iba mensem nung Yim Pungu..." Longkhum, Mangmetong, Longmisa, Chuchuyimlang aser Changki..... nungi arua shilem agi. Tamburtemi shia aruba otsutem koda Aienger Semchirtem lia aru Yim balalai pakshi itemji jangjashitepba teloki agizüka ayu.



Sd/ (Wb. Moasutsung Longchar) Secretary, DC LKT,

(Wb. Tekaningsang Longchar) President DCLKT

Chhattisgarh nung Vedanta power plant apokba lendong nung 23 asü New Delhi, April 18 (Agencies): Chhattisgarh kübok Sakti district nung aliba Vedanta power plant nung tube apokba lendong nung asür ajak senteper 23 jungogo.

Honibarnüa nisung ana meküzmzükteti asü aser tang nisung 12 hospital balala nung treatment agidar, ta ketdangsertemi metetdaksü.

Industrialist Naveen Jindal-i, bushisingdang metenzükdangyongi Vedanta Group chairman Anil Agarwal anema FIR benokba atema tebilemtsü akar, ta metetdaksü.

Osangbenertem den jembidang Sakti Superintendent of Police Prafull Thakur-i, "Hospital balala nung treatment tagidak mapang tanep ano nisung ana süogo," ta metetdaksü.

Honibarnep asür anaji ka West Bengal kübok Medinpur nungi Subrata Kumar Jana aser Jharkhand kübok Garhwa nungi Upendra Sah na lir, ta Thakur-i metetdaksü.

April 14 nü Singhitarai yimdak aliba Vedanta Ltd power plant nung boiler nungi turbine tashi high-pressure steam belenba tube ka apokba lendong nungji aika kanga mejungi yirua liasü. Iba tesem nungjisa nisung pezü asü aser kasa anogo nungjisa nisung 9 asü.

April 15 nüa nisung tenet asü aser April 16 aonung ka asü.

Iba tatalokba dak sendakba nung police-i FIR ka benokogo.

SP Thakur-i, "FIR nungji Vedanta Group chairman Anil Agarwal aser plant head Devendra Patel na densema nisung 8-10 tenüng tetshia lir. Bushisingdangba mapang nung ano tenüng kar züngoktsüa akok," ta metetdaksü.

Boiler nungji totzü tali atsüngdenba ajanga tube ji apok, ta mezüng bushisingdang ajanga bushitetogo, ta police-i metetdaksü.

Sakti nung aliba Forensic Science Laboratory (FSL)-ia boiler nungji totzü tali atsüngdenba ajanga iba lendong atalok, ta metetdaksü.

Chief Minister Vishnu Deo Sai-i Commissioner of Bilaspur division dang iba tatalokba bushisingdang, ta tuyuogo.

Honibarnep industrialist Jindal-i X ajanga, "Chhattisgarh nung lendong tulu atalokba atema jashia bilemer. Kibong 20 bo ajak samaogo. Item kibongtem nem teyari shidak agütsütsüla aser iba tatalokba jungjunga bushisingdangtsüla.

Ajisüaka bushisingdang metenzükdangyongi FIR nung @AnilAgarwal_Ved tenüng züngokba atema tebilemtsü akar. Pa ya ajemalur ka aser tilaka nungi tenzüka jenjang junga amentetba nübo ka lir. Iba plant operation nungji pai shilem agia mali," ta metetdaksü.

Jindal-isa, "PSU (public sector undertakings) plants mesüra Railways nung lendong atalokba mapang nung asenoki Chairman tenüng tetshir asü? Asenoki yamaji meinyaker. Yamaji nija sector nunga kasaji inyaksüla," ta metetdaksü.

Küm 12 tsüngda Modi-i tang mezüng tamakok ajuruogo: M K Stalin

New Delhi, Rongchii/April 18 (Agencies): Parliament nung delimitation bill tamakok anguba atema tepela nung Tamil Nadu Chief Minister, M K Stalin-i lokti nem nanglong lemtsü aser firecrackers amshia liasü.

Stalin-i, pai mezüng tsükloksüba mi ajanga Delhi nung mezümeküm rondokogo aser Ato kilonser Narendra Modi den BJP-i tamakok tulu nguogo, ta ashi.

Lok Sabha nung menden 850 akümtsü aser tetsürtem nem menden shilem 33 lezmütsütsü atema delimitation bill benoka liasü saka two-thirds majority mengutetba ajanga iba bill tamakok angu.

Hokolbarnü Stalin-i delimitation document ka rondoka liasü aser Honibarnü Dindigul nung election nüboyim

sentong ka nung jembidang pai, "Nenoki kü nem khuret nungloksüba nung ajemdaker ni Tamil Nadu chief minister ka ama tsükloksüba ajanga Delhi nung mezümeküm rondokogo. Asenoki delimitation anema nokdakba ama takok nguogo. Süoshi tanak asemertemi saffron telok tamakok ngudaksüogo," ta ashi.

Stalin-isa, küm 12 tsüngda tang mezüng Ato kilonser Modi-i tamakok ajangshio, aser tang tamakok tulu anguba ya tetenzüker dang, ta ashi.

Paisa, April 23 nü state assembly elections nung DMK-i aniba teloktepi menden 200 dak tali nung takok angutsü, ta metetdaksü.

Stalin-isa, iba bill tamakok ya AIADMK general secretary Edappadi K Palaniswami atema election jakdang tamakok ka lir, ta

ashiba den külemi voters dang April 23 nü BJP aser parnok meyong alar Palaniswami tamakok ngudakjang, ta ashi.

Delimitation ajanga talisa south tsütsü aliba state tem kanga aoksatepa liasü. 1971 Census masü saka Census tasentiba nung ajemdaker delimitation exercise agiba ajanga nütsüng tali arenba azüoktsü atema meranga inyaka takok anguba state tem kanga takoksa angutsü, ta parnoki bilema liasü.

Stalin-i, delimitation ajanga Parliament nung Tamil Nadu atema lezmütsüba menden ajema akümtsü, ta aiben jembia aruogo.

Iba bill tamakok ngudaksüba atema Stalin-i X ajanga Congress lenir Rahul Gandhi densema opposition INDIA teloktep nung lenirtem dang pelaba lemsatep.

Strait of Hormuz nung India nunger rong ana dak injang khaloktsü

New Delhi, April 18 (Agencies): Honibarnü Strait of Hormuz nung India nunger rong ana dak injang kahloksüba sülen India-i tejashi metetdaksütsü aser tasüngdangba akatsü atema Iran Ambassador, Dr Mohammad Fathali jaokogo.

India-i iba tatalokba atema tebilemtsü akaba aser mepelaba Fathali nem metetdaksütsü, iba denji külemi civilian rong nung injang kahloksüba atema tasüngdangba akatsü, ta osang ka ajanga metetdaksü.

India nunger wako songa aliba rong ana nung injang khaloktsüba sülen Ministry of External Affairs-i Iran Ambassador jaoker.

Tang tashi nungbo iba tatalokba nungji nisung yiruba mesüra rong raksaba osangbo mali.

Iranian Revolutionary Guard units-i Strait of Hormuz nung India nunger rong densema rong kar dak injang khaloktsüba sülen rongji lenmang melenshitsüsa aküm.

India nunger rong anaji Larak asetkong anasa IRGC kübok aliba detour point nung lia iba lendong atalok. Honibarnü India nunger rong ka dang Strait of Hormuz adena arutet.

Anepdang India nunger rong 8 Strait of Hormuz tonga arua liasü, ajisüaka Desh Garima rong dak alaka tanüngba rong tenetjibo meyipa aotsüsa aküm.

Directorate General of Shipping-i sangdong ka ajanga, "Onoki iba tensa mita reprangdar aser tzüyim nung senzür India nungertem aser India nunger rongtem kümzüka alitsü atema telemtetba agia inyakdar," ta metetdaksü.



New Delhi, April 18, 2026: Parliament nung Budget senden tembangba sülen Lok Sabha Speaker Om Birla-i Union Home Minister Amit Shah, Union Parliamentary Affairs Minister Kiren Rijiju, Congress MP Kumari Selja, Congress MP KC Venugopal aser tangartem ajuruba noksa nung angur.



TIR YIMYIM YIMOBILEM (EDITORIAL)

DIMAPUR SUNDAY, APRIL (RONGCHII) 19, 2026

Asenok temeli

Asenok bang nungi adokba o shiaji asen mulungjang nung tama bilemer külenang adoker, anungji asenoki jembiba o jagi asen mulungjang noksa sayur. Nai jembiba o agi tangar mulung anisüngzükra aser nü meli agi tangar peladaktsüra, nü dak temeim aketba temulungjang lir ta iba jagi kuli asür. Aji oda, asenoki teti asen bang agi Yisui kümzükba indang jembira, iba jagi asen mulung nung teti Yisu Khrista zü tokshiba ajanga angati tekümtet anguba indang pelaa bilemba kuli asür. Nü mulungjang nung temeim lira, iba temeim ajanga nü bang nungi o tajung adoktsü aser iba jagi shisabolua alir aika tesünep aser anisüngzük angutsü. Asenok aikati tebang ajanga tebokleni yokba agi asen temang aser tanüla menendaktsür ta bilemer saka Yisui ashi, " kechi tebang nungi adoker aji temulungjang nungi adoker aser iba jagi nisung menentsür. Nisung mulungjang nungi shisatsü tamajung adoker aser item jagi nisung menentsür, saka teka memetsüki chiyongba agibo nisung memenener." (Mathi 15 :18-20). Asenok aikati asenok tebang tamajung saka temulungjangbo tajung amai bilemer. Ajisüaka, Laishibai ashir, temulungjang nung bilembatem dang tebang nungi adoker, anungji asen mulungjang temeim agi sünga lira temeim o jembitsü aser tenükmerem shisatsü agi sünga lira tesemba o jembitsü. Yakob tapu 3 nung ashir, asen mang nung temeli tilaka aliba yagi ngasangatem o tululu jembir aser iba jagi mi tila kati arem tulu rongyonga ao ama tangar aika nem timtem agütsüyonga aotsü. Temeli ajanga o tamajung jembir aser iba jagi nisung ka taküm rangben raksaja pa takümji molumi milak manung yutsür. Tetezü, asen bang nungi tiyazü aser o tamajung adokba ajanga nisung aika mulung zürepdaktsür, kibong aika nung tejashitep aser rarabangsen adokdaktsür aser nisung o nisung na meputepi kümdaktsür. Tebang-temeli nungi adokba o tashi (power) ya kanga tesashi, iba yagi alima nung rara adokdaktsür aser yimjunga yanglur. Aji oda, o koma jembir iba amaji kibong aser lokti taküm a alitsü. O tajung jembira kibong aser lokti taküm tesünep nung alitsü saka o mejungi jembira kibong aser lokti sünepa malitsü. Asenoki aiben asen bang nungi jembiba o agi tangar dang masü saka asenoka dena jashitsüsa jembir. Asenoki jembiba o agi asenok sasatsüsa jembiba tetezüji asenoki tangar taküm menendaktsüogo ta bilemdi. Asenok bang nungi o ka ken jembizüka yokbaji lijakjang kazüka yoker amai dang, ibaji kodang meyipa marutsü. Aji oda, aseni jembiba o ka kodanga mejembi mesütettsü. Asenoki tangar nung asener asü mesüra tangar ajungba indang jembir, iba jagi asen mulungjang sayur. Asenok aikati asenok mulungjangbo tajung ser nung tebang dang majung amai bilemer. Ajisüaka, ibaji kenyongi tai a ta Laishibai ashir. Tangar kar mulung animesüngzüktteti alidang, nü o agi tesünep angur asü ? Nisung kar maparen kar nung tezüngdang jashia alidang, nü bang nungi tajungshi o tajung adoker asü ? Tangar timtem nung alirtem bilemteta nai sarasademtsür asü ? Item ajakji pei mulungjang nung tama bilemtsü aser ibaji o kümer pei bang nungi jembir. Nisung aika mulungjang nung shisatsü majungba ajanga tebang nungi o tamajung adoker, anungji kidang kinüngertem den meputeper aser kiyongertem den tsükchi ayimer. Aji oda, asenok tebang nungi adokba o agi tangar mulung yirudaktsüa lira, asenoki Tsüngrem dang taidok meshidi aser temulungjang tajung tasen ka meshidi. Shisa tajung adenba temulungjangji tenükshitsüka aser temenungratsüka, iba jagi teti Tsüngrem tenüng asangtsü aser tangar ajung indang jembitsü. Iba mulungjang nungi adokba o agi aika aneptsü aser mulungsüngzük angutsü. Asenok taküm, kibong aser lokti sünepa alitsü asoshi iba ama mulungjangji Tsüngrem dang meshidi. Asenok ajaki tajung bilemdi aser o tajung jembidi.

OLEMSABANG

NAGA NUNGER NÜBURTEMI TEMELENSHI KA AGINUR

~ L. Kika Pongener

Tanü asen Naga nunger nübur ajunga taginubaji; asen Naga lima nung temelenshi ka aginur. Naga lima nung yimden yimsoshiba ka aginur. Yimden nung dang masü; saka tamangba yimsu dak sendakba lokti-tentet, arogo aser mungdang nunga teyanglushiba ka aginur. Surabangla, asen lima tajungba küma yanglushirji shirnok asütsü...??? Bendang lima kar nungi tashitemeteter kar anir arur yanglushidaktsütsü asü (?) Aji oda, asen limaji asen nüburisa yanglushitsüla; aser aji lanur tazünger (Educated Youth)-temi anir tongti shilem agia yanglushitsüla. Tanübo asen lima nunga lanur tazünger lenla (Field) ajak nung aika adoka lir. Item lanurtem dak pei lima yanglushitsü temulungtetba tulu alitsüla. Küm ana-aseem shi suiogo; Nepal lima nung lanurtemi 'Revolution Movement' ka tenzüka sorkar inyakyim majungba yanglushiba ajangshia aruogo. Ano küm ana shi suiogo; Bangladesh lima nunga lanurtemi 'Revolution Movement' tuluka tenzüka sorkar inyakyim meshitakba anema nokdakba ajangshia aruogo. Anungji tanü asen lima yanglushitsü asoshi asen Naga nunger lanurtem dak tasütait aser ochi tangatetba shisatsü tesadem alitsüla. Tanü asen lima nung yimden, arogo aser mungdang yanglushitsü asoshi temulungtetba tulu aliba, tasü-tait aser ochishir lanur lennir aginur.

Aji oda, tamasa asen Naga nunger dak aketba tangatetba temesu shisatsü ya melenshitsüla. Tanü asen lima nung sorkar yimsusuba reprangdangra; nisung kati mulungba nung yimsu asüba linuk ka ta ashitsü akok. Asen Naga nunger yimsusur teimba ka dak linuk aser nübur meimba shisatsü mali; pei ajungtsü dang bilemba agi sünga lir. Iba shisatsü temesu tangatetba ya memelenshira; asen lima tajungba ka küma meyanglushitettsü. Lanur tazüngertema Doctorate, Post Graduate, Graduate aser Technical Degree tulu akoshia zünger; sorkar mapa (White Color Job) ka bushir itasen chia alitsüba; iba tashi dang angatetba shisatsü temesu ya memelenshira asen lima maintsü. Kechiba asen Naga nunger lanur tazüngertemibo; pei azüngba 'Field' nung; pei sasa mapa tenzüka (Entrepreneur) ka-ka akümstsü memeranger (?) Shitakba-bo pei azüngba 'Field' nung pei sasa mapa tenzüka inyaka; tangar küpok 'Employee' masü; saka tangar nema mapa agutsür 'Employer' asütsü merangtsüla. Asen Naga nunger lanur Graduate-walla aser Post-Graduate-walla karbo Police Constable Post atema merangba osanga angazüka kangasa sungmanger...!!! Tssuuuu...!!! Kodaser Graduate & Post Graduate Degree tashi akoshia zünger pei sasa meranga inyaka; pei mapa madak pei kibur kümer alitsü melena....Police Constable ka inyaktsüba...iba tashi dang angateter noo...??? ta kanga sungmanger...!!! Anungji iba tangatetba shisatsü temesu yabo melenshitsüla. Tsüraburtem-ia chirnur Degree tulu züngdaktsür; sorkar mapa dang inyaktsü ajungshiba yabo melenshidi.

Tanü asen Naga lima nung lanur zünger mapa mongui alir (Educated Un-employed) lakh tema lir ta angazüker. Ashiko, ano lanur Theologian-tema mapa mongui alir merijang ishikabo alitsü sudi. Anungji item lanurtemji longjemer asen Naga lima yanglushitsü asoshi 'Teyanglushir Telok' (Revolutioner) ka nungdaker. Iba 'Teyanglushir Telok' nukjidongji; Sorkar nungi tenzüker yimden, arogo, mungdang aser loktiliba ajak nung ochimashi (Corruption) mapatem anema tasü-ita nokdaktsüla. Iba 'Teyanglushir Telok' tanabuba nukjidongji 'Clean Election' yimyim asütsüla. Asen lima nung Election shia yimtsüngtem nung aser Polling Station nung nisung teshimtet kari dang yimer ajunga Vote ajentsüba aser 'Polling Station Coup' asüba; iba amala mapatem ya anendaktsütsüla. Asen lima nung Election shia Candidate-tem sen Crore-sa Crore endokba aser Vote sen-yong yoktepba ya meshi-meshia samadaktsütsüla. Asen lima nung Election shia yi taluposa amshiba, züktepa raratepa nisung taküm dena tepsetba; item mapatem ajak ya meshi-meshia anendaktsütsüla. Iba 'Teyanglushir Telok'-ji Aor lanurtemi anir tongti shilem agia tenzüksü ajungshir. Iba mapaji takok ngua inyaktsü atema Election shia yimtsüng aser town ajak nung; iba 'Teyanglushir Telok' jagi lanur nubu tajung shimteter; sen-yong Vote ayokba, nübur ajunga Vote teshimtet kari dang ajenba, yi amshiba, raratepa züktepba item mapatem ajak azüoktsüla.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Ukraine Arogoi Canada nunger putir ka nem medal agütsü



Rev. J. Paul Richards-i medal amer tangokba noksa nung angur.

April 18, 2026: Ukraine den pastoral tesendaktep ayuba aser Ukraine nungita yariba atema Canada nunger putir ka nem "For Sacrifice & Love for Ukraine" medal agütsü.

Tangar timtem mapang nung nungita yariba atema pa nem iba medal agütsü.

Amongnü (April 12) Orthodox Church of Ukraine-i Canada nung aliba New Westminster Diocese nungi Rev. J. Paul Richards nem iba

medal agütsü.

Rev. Richards-i, "Ukraine nung aser bendang lima balala nungi aikati Ukraine nung timtem ajangshirtem yaridar, aser iba award ya ajanga ibaji sayur. Tatem nungbo, iba ya timtemertem nungita yariba indang lir," ta ashi.

2022 kum February ita nungi tenzuka Russia sepaitemi Ukraine amak tenzükba sülen Rev. Richard-i Ukraine aiben semdangogo. Pai Ukraine nung

aliba hospitals, rehabilitation centres aser organisation aika den yariteper.

Pai Ukraine yimtiba, Kyiv nung aliba Christ Church nunga tekülem sentong agiogo.

Ukraine nung raraba mapang Orthodox aser Catholic Arogo tsüngda amalitepa inyakba nüngtem nung Ukrainian Catholic Church nung putir, Mykhailo Ozorovych-i Rev. Richard nem iba award agütsü.

India nung ozüng tasen ka ajanga Khristan mission mapa kongshitsü

April 18, 2026: Tang India nung foreign funding dak sendakba ozüng ka yanglushitsü aliba ajanga India nung Khristan mission mapatem kongshitsü, ta Arogo nung lenir kati metetdaksü.

Foreign Contribution Regulation Amendment Bill ajanga sorkari FCRA licence thinenja aliba organizations aser melungtet teloktem indang kiojen agütsü atema sorkar nem temelaba agütsü.

India nung FCRA licence aliba melungtet teloktem nem dang bendanglen nungi senotsü teyari agizüksü atema temelaba agütsü.

All India Christian Council nung tongti, Dr Joseph D'Souza-i, "Iba nung ya lendong keta lir aser tebilemtepa akatsüsa lir," ta metetdaksü.

Iba ozüng tasenba kübok Hindu yimsü alia amangertemi

Khristan meyong kiojentem rakzüksüa akok, ta aikati shisabulua bilemer.

Release International (RI)-i, India sorkari foreign funding nokdangba ajanga Khristan charities aser mission organisations azüoktsü meranger, ta aitsü.

RI-isa, 2014 kum BJP sorkar aruba sülen FCRA license 20,000 dak tali thinentüsügo, aser ibaji ajanga bendanglen nungi senotsü teyari aruba nokdangogo, ta metetdaksü.

FCRA Amendment Bill ji taküm June-August nung Parliament senden aliba mapang nung benoktsü.

Release International-i India nung aliba Khristantem densema alima tesem balala nung aliba Khristantem dang iba bill anema nokdaksü ayongzükogo.

Release International-i sangdong ka ajanga, "Küm 50 dak tali Brazil aser South Africa na nungi tenzuka Mexico aser Australia tashi nung tamangertemi tenla agütsüba ajanga India nung kanga sensakertem taküm ajungkettsüba tamendakdak yanglua liasü," ta metetdaksü.

Release International CEO, Paul Robinson-i, FCRA ozüng yanglushitsü atema benokbaji ajanga India nung Khristantem anema inyakba tensa sayur, ta ashi.

Paisa, state aika nung anti-conversion ozüngtem benoka lir, aser item ozüng ya shidakbabo kangshia yimsü meyipdaksüba nungi nisungtem kümzüksü atema lir, ajisüaka tim masüba nung iba ozüng amshia Khristantem densema tanga minorities anema inyaker, ta metetdaksü.

TN nung putirtem aser Khristian forums-i DMK Front yaritsü

Chennai, April 18 (Agencies): Tamil Nadu Bishops Council aser Christhuva Vazhvurimai Iyakkam-ibo, DMK inyakyim kar nung metokmeperi lir, ajisüaka DMK-i secular tangatetba nungi mepilar, ta metetdaksü.

Ano Khristantem telok karibo Vijay-i tentetba Tamilaga Vettri Kazhagam yaritsü ta metetdaksü.

Item forum-i külem sangdong ka ajanga DMK-i aniba teloktep tamakok ngudaksütsü, ta metetdaksü.

Ano külen Tamil Nadu Bishops Council aser Christhuva Vazhvurimai Iyakkam-ibo, DMK inyakyim kar nung metokmeperi lir, ajisüaka DMK-i secular tangatetba nungi mepilar, ta metetdaksü.

Parnokisa, telemsa adokdaksürtem tamakok ngudaksütsü atema tangatetba kijabo menügdaker, ajisüaka yimtenren aser organisation tashi itta alitsüla, aser DMK-i aniba teloktepi dang ibaji inyaktetsü, ta ashi.

Parnokisa, taruba election ya

state nung loktiliba aser yimtenren atema kanga tongtibang mapang ka asütsü, ta metetdaksü.

Parnokisa state nung Khristantem dang candidate ka yimsü dang mereprangi parnok tangatetba aser teloktep tangatetbaji shisadanger ang vote agütsütsüla, ta ayongzük.

Ano tanga osang ka nung, minister P K Sekarbabu densema DMK nungi lenirtem aikati Chennai nung Archbishop Rev. Dr George Anthonysamy ajurua temoatsü meshiba den külemi teyari meshiogo.

ANOGO ABEN TSÜNGREM DEN

ADIANU TELUNGJEM

"Nai ni yok to alimai amangisi asoshi ni ne dak aser na kü aliba ama parnok ka dang küma asenok dak lidakjang"

~ Yohan 17:21

Adianutem telungjem nung alitsü koda tajung aser a koda tenükshitsü ka lir. Dawid-ia T. Ken 133 nung shia lir "Ajiang adianutem külemi telungjem nung alitsü koda tajung aser jangratemtsü lir." Asen kinunger kar oda talangka majurui aliba ajurutepdang asenok koda pelar, asen asoshi aji temoatsü mapang ka ta züngshir. Anungji telungjem, keta sentepa, jungtepnüba item teraji bushidangra temeim nungi adoker.

Yohan 17 nungji Khristai Khristanpur telungjem asoshi sarasademba asenoki angur. Tebu o Techir na tsüngta koba telungjem ali asenoki ibaji angatet nungdang asenoko asenok na tsüngta telungjem tajung adoktsü. Tebu aser Techir tena tsüngta tebilemba, teimla aser nükjidong kasa dang lir. Amangbapurtem telungjem noksa tabensabaji Pau 11 Korint 12:12-30 tashi nung shia lir. Khrista nung amangbapurtem ajak tenüktelen kaka aser ibajagi asenok ajak ka küma lungjemdaksür. Asenok Khrista mang lir aser asenok o asenok na meputepa Tsüngremer nükjidong asenok amangbapur ajanga mataloktsü. Asonok ano tall meimtepdi aser lungjemshidi arungma.

SARASADEM:

O Kibuba, ne mang nung onok tenüktelen tabensaba kümdakjang. Amen

India sorkari Christian Welfare Board ka tentetsü tebilemba lir

April 18, 2026: India nung Khristantem anema Khristantem ajangshiba tesempa o jembiba mesüra tebilemtepa onük balala Khristantem anema bentetsü atema sorkari inyakba nokdangtsü National Christian Welfare Board ka tentetsü tebilemba atemabo nendaka meinyaker, ta aikati bilemer.

Iba osang ya media-i prokshi, ajisüaka tang tashi nungbo sorkari sangdong magütsü.

Iba osang prokba sülen Khristan organizations aser yimtenren nung o entep tenzükogo, karibo ibaji pelaa agizüker, ajisüaka karibo ibaji ajanga Arogo tashi ajema kümdaksütsü, ta arendaka bilemer.

BJP sorkari nütsüng lenir, Jose K. Mani-ibo, iba ajema aliba Khristantem puatsü atema mapang shia mapa balala inyaker, ajisüaka linük tesem ajaklen

National Christian Welfare Board ka tentetsü atema benokba ya Foreign Contribution (Regulation) Act (FCRA) amendment bill den sendaktepa lir.

Karibo, Christian Welfare Board aser FCRA na sendaktepba ajanga Arogo kiojen aser inyakyimtem sorkari azüoktsü, ta bilemer.

Kerala Congress nung Board tentetsü atema benokba ya Arogo tashi ajema kümdaksütsü atema lir, ta shiogo.

AO OSHI ANGAZÜKDAK:

TANÜ ANGAZÜKTSÜBA OJANG



Ya

(pronoun) ibai (this)

* Iba nisung ya ozü kinunger lir.

Yabang

(v) ali ama agi langka nembangba (cover with soil type material)

* Shiruru tasü mang ka ali agi yabanga toktsü.

OLONG PAITEP # 7478

| | | | | | | | | |
|----|--|----|---|----|---|----|--|----|
| 1 | | 2 | | 3 | | 4 | | 5 |
| | | | | | | | | |
| | | | 6 | | 7 | | | |
| 8 | | | | | | | | |
| | | | | | 9 | | | |
| | | 10 | | | | | | |
| 11 | | | | | | | | 12 |
| | | | | 13 | | 14 | | |
| 15 | | | | | | | | |
| | | | | | | | | |
| 16 | | | | | | 17 | | |

TIPLÉN

- 1. Nüji masü - (4)
- 3. Technütsüka - (6)
- 7. Aketa shirangba - (5)
- 8. Pi - (6)
- 9. Amena - (5)
- 10. Kinü - (5)
- 11. Tanang masü - (5)
- 13. Lenmang - (6)
- 15. Nübo tedi - (5)
- 16. Tuoshi - (6)
- 17. Shiruru apuba temenatsü - (4)

LANGTSÜNGLEN

- 1. Jila tulu - (5)
- 2. Sarasadem dang tembang - (4)
- 4. Tarutsü indang ashitem - (6)
- 5. Alia - (5)
- 6. Mojing - (5)
- 9. Tai inyakba metet - (5)
- 10. Medemer chijiba - (6)
- 11. Tatokba / Amadok - (5)
- 12. Anü dang masü - (5)
- 14. Jabaso masü - (4)

OLONG PAITEP # 7477 TELANGZÜBA

TIPLÉN :

- 1. Tajang, 5. Berem, 6. Üng, 7. Nati,
- 9. Asü, 10. Tamagitsü, 12. Sak,
- 14. Joko, 15. Nga, 16. Anü ng,
- 17. Tzürem.

LANGTSÜNGLEN :

- 1. Takar, 2. Jongdak, 3. Teki,
- 4. Lemtsü, 8. Tai, 9. Asangur,
- 10. Talang, 11. Aso, 13. Taküm,
- 14. Jung.



ALOKBA DEN SHISATOKTEN

Alokba

: Tanü ni nenok den sobaliruyim kar shidi, 1, Sayutsü ngir jagi tepang agidang masü temolungjang agi sayutsü ngitsüla, 2, Mejanger mesaktsü tsübuba agi aonung memejangba kisü ng jagidangbo takümü mekü mzü ktsü, 3, Tasür kidangi aodangbo taori salem asütsüla, saka sadir kidangi aodangbo kiburi salema agizüktsüla, 4, Aonbo nung jaa atudang ngashi tsüker yokba jiang masü, saka milongsangji atsütetotoktsüla, 5, Tasür kidang ajebbaji shidak, saka tasürji shia arutsü merangabo majebtsüla, 6, Tetsübu tolutibaji chii shi tsübuba agi poknüngleni jena aluba ya lir, 7, Pongmang nung aonung arurata pongmangbaji asangsang nungbo anüpdangleni aruya alitsü, 8, Taluri kodanga shinga meyipa atur majuruba lenmangji asüyimi aluba lenmangji lir, 9, Asenoki kechi memeteti inyaker, aji memeteti inyakerata metetatoktsüla, idangjidang tarutsü timtem nungi jenbuttsü

Telok

: O Alokba !!!

-- Lilir, I. Kilang Ajem, Indisen, Dimapur,

BJP ajanga Tipra Motha-i takok angu

Agartala, April 18, 2026

(Agencies): Tripura Tribal Areas Autonomous District Council (TTAADC) elections nung Tipra Motha Party-i takok tulu anguba ya lisopur temulung nung kongshiba ajanga lir aser iba ya BJP ajanga liasü ta Congress aser CPI(M)-i metetdaktsiogo.

April 17, 2026 nü TTAADC results sangdong aser iba nung Tipra Motha-i menden 28 nungi 24 nung takok ngua liasü. BJP-i menden 4 nung takok angu saka Congress o CPI(M) tazü ngla liasü.

"Congress-i takok mangutsü meteta dang menden 28 prong nung toktep aser onoki vote share tajungba akü mtsü nung dang temulung agütsü" ta Tripura Pradesh Congress Committee president Asish Kumar Saha-i ashi.

"BJP-i nüboyimba maparen ajanga lisopur temulung yirudaktsü. BJP-i non-tribal voters teyari angutsü merangba ajanga lisopurtem tali longjemdakttsü aser ibaji ajanga Tipra Motha ajanzük" ta Saha-isa ashi.

Election nüboyimba mapang BJP tanishirtemi Tipra Motha anema o jembiba ajanga lisopurtem temulung yirudaktsü aser ibaji results ajanga sayur ta paisa shisem.

"Congress-i tamakok nguaka voter support nung tajanzük nguogo aser onoki maneni lisopur temetentem atema noktakttsü. Talisa Tripura nung tribal aser non-tribal tsü ngda yimjung aser putepa alitsü mepishir" ta Asish Kumar Saha-isa ashi.

"TTAADC nung electoral environment majungba ajanga onoki menden ka nung danga takok mangu. Tipra Motha-i tesüiba küm pungu tashi ketdangsä aruba miimbanga ayutsü atema nisungtem temulung kongshitsüba onüktem dang jembi" ta Leader of the Opposition aser CPI(M) tanishir Jitendra Chaudhury-ia ashi.

BJP-i Tipra Motha nem teyari agütsü. Vote enoktsürtemi lisopur taginüba samatsü ta tsübua bilemba agi Tipra Motha yari ta pai ashi.

Molungnen O

"Aser parnok tenük nungi nüktzü ajak Pai aidoktsütsü; aser tasüba joko malitsü, mangyimtsü mesüra tajebsü mesüra tekangshitsü joko malitsü. Kechiyong tejenbatem süitemogo"
Jungkai Adokba 21:4




Asür Yarentozung Pongen
01.07.1947 - 07.04.2026

Onoki teti meima aliba obala **Asür Yarentozung Pongen (Mongsenyimti)**, shiranga aliba mapang aser akümüli wadang tembangba mapang sarasadem, temeim, rongsen, nübu aser shisatsü agi yariteper ajak dang kinunger temi pelaba lemsateper. Onok dang aria bilema nenoki yimya balala nung temeim sayuba ajanga onok mulung zürep tia nung alidang tashi agütsüogo aser anisungzük nguogo. Onoki nenok dang kanga pelar.

Temeim Tsü ngremi nenok taküm kibong maneni moajang ta ozü sarasadem.

- Temeim Kinungtsü, Chirnur, Semchir aser Kinungertem.

MENUNGRA BILEMTETER



LATE LANUSUNGKUM JAMIR

Oba, na onok nungi pilar tanü (19th April, 2026) küm ka abensar, saka ne temeim shisatsü aser senti mapang onok mulungjang nung teti lir. Tanü na onok den meliaka onoki na menungraseta ne nem akhüm agüja sarasadema amunger.

- Temeim kinungtsü, chirnur & kinungertem

Tetsür anemba Congress-i tetsürtem tejashi ajurutsü: Kiren Rijiju



New Delhi, April 18

(Agencies): Parliament nung Constitution amendment bill ka tamakok anguba sülen anogo ka lir Honibarnü Parliamentary Affairs Minister Kiren Rijiju-i, Congress ya tetsürtem anemba party ka lir, anungji parnoki linük nung tetsürtem tejashi ajurutsü, ta ashi.

Paisa, "Tetsürtem nem parnok temeden magütsüba atema opposition-i benjungteper; iba linük nung tetsürtemi parnok dang tansütsü lesson ka sayutsü," ta ashi.

Union minister-i, Congress ya tetsür anemertem lir, aser tang ibaji jungkai adokogo, ta ashi.

2029 küm Lok Sabha election matongdang Lok Sabha nung menden shilem 50 agi teimba akümütsü aser tetsürtem nem menden shiteta yutsütsü atema sorkari temeja Parliament ka ayongzüka Constitution (131st Amendment) Bill benoka liasü saka iba bill tamakok nguogo.

2011 küm census nung ajemdaker delimitation exercise agütsü tebilemba liasü, ajisüaka opposition INDIA teloktepi longjemer iba bill anema nokdaka liasü.

Hokolbar aonung Lok Sabha nung iba bill atema vote agütsütep dang MP 298-i iba bill pusema vote agütsü aser MP 230-i iba bill anema vote agütsü.

Iba bill atema vote agütsür ajak agi parnok 528 liasü, anungji two-thirds majority angutsü atema vote 352 nüngdaka liasü.



Fortified product Range temasadangang!

Fortified Wheat flour

Fortified Totzú

Fortified Jang

Double fortified metsü

FORTIFIED SAMPOORNA POSHAN SWASTH JEEVAN

- Vitamin A-**
Night Blindness nokdangang
- Vitamin D-**
Teret nung yarir
- Iodine-**
Normal aitsü atema teyari
- Iron-**
Anemia nokdangang
- Folic Acid-**
Foetal terenlok atema tongtibang
- Vitamin B12-**
Nervous System atema tajung

fssaiindia fssai fssai_safefood fssaiindia fssai_india

State Food Safety Authority,
Department of Health and Family Welfare, Govt. of Nagaland
For any consumer grievances, mail us @: foodsafetynagalandhelpline@gmail.com

S-Iran sensaksem atema Pakistan PM, army tekolakba nati linük balala semdang

Islamabad, Rongchii/ April 18 (Agencies): United States aser Iran na rara tembangdaksütsüsü atema jenjang agiba maneni tejakdangi bener aotsü nükjidong nung Pakistan Army tekolakba aser Ato Kilonser nati linük balala semdangogo.

Field Marshal Asim Munir ya Tehran toktsürogo aser Ato Kilonser Shehbaz Sharif Turkiye nungi kidangi meyipaogo.

Munir-i anogo asem atema Tehran semdangba mapang Iran nunger lenirtem aser yimjung atema sensaksemertem den ajurutepogo, ta Pakistan military-i Honibarnü sangdong ka ajanga metetdaksü.

Lenir anati item linüktem semdangba ajanga, sensaksem ajanga o bentetdaksütsüsü aser yimjiyimjung ajungketsü atema Pakistan bendanga agütsür aliba sayur," ta taruba anogo ishika Islamabad nung sensak asentsü imla aliba mapang military-i ashi.

Munir-i linük tir foreign minister, parliament speaker aser Iran indang military central command centre tekelokba den sensaksema liasü.

Parliament Speaker, Mohammad Bagher Ghalibaf, aser Foreign Minister, Abbas Araghchi na lenisüba nung taoba

hopta Iran nunger lenirtem Islamabad nung yimjung atema sensaksem nung shilem agi, koba Washington aser Tehran na tsüngda küm aika sülen temaba jenang nung tejak o tejak na chitepa sensak asema liasü.

Sensaksem nung telemtetba kecha magitet aser tang ceasefire ka benoka aliba ya April 22 nü tembangtsü lir.

Ajisüaka diplomacy bo maneni odar aser yimjung atema inyakyim maneni tejakdangi bener aotsü atema Pakistan Ato Kilonser Shehbaz Sharif-i Saudi Arabia, Qatar aser Turkiye nunger semdangogo.

Pai linük asem semdangba ya Honibarnü tembangogo. Sharif aser Foreign Minister Ishaq Dar na Antalya nung diplomacy forum ka nungi pilaogo, ta ketdangsür anapronglai metetdaksü.

"Ni tajangshiba tajung aika bener Antalya [Turkish yimti] toktsür, aser iba den linük ana tsüngda tesendaktep akangshitsü, teti atema yimjung asoshi sensaksem aser diplomacy dak sendakba nung maneni teka amteper inyaksü aser onok meketa aliba tesemtem t a m e n d a k d a k akangshitsüsü atema temulungtetba nung iba yimti toktsür," ta Sharif-i X nung post sütsü.

(Maneni tapak 8 nung...)


CHRISTIAN HIGHER SECONDARY SCHOOL

NYAMO LOTHAR ROAD, DIMAPUR - 797112, NAGALAND
E-mail: christian.dimapur@gmail.com / Website: www.chssdimapur.in

We design your child's future
IN LOVE AND



We build your child's career
TRUTH WE STRIVE



ADMISSION FORMS & PROSPECTUS

FOR CLASS 11
(Arts & Commerce)
2026-27
BOTH BOYS & GIRLS
AVAILABLE AT THE SCHOOL OFFICE
DURING OFFICE HOURS
(9:00 am - 1:00 pm)

Contact: 9862835655

SPECIAL FEATURES

- Qualified, Trained & Dedicated Teachers
- Summer Bible School
- Scripture Retreat
- Career Guidance Cell
- Smart Board Classrooms
- Hostel for Boys
- Basket Ball Coaching (Affiliated with DBA)
- Cricket Training (Affiliated with NCA)
- One on one counseling by clinical Psychologist
- Mentor Mentee programme
- 19 Life skill building clubs
- Well furnished library
- Digital Vawsum App
- Annual Educational Tour
- Academic field trips

2buba Nagaland Women Futsal League May 11 nungi asayatsü



Taruba 2buba Nagaland Women Futsal League 2026 atema Youth Resources and Sports Department, Government of Nagaland, aser Nagaland Football Association nungi ketdangsürtem senden amenba mapang tangokba noksa nung angur.

Dimapur, Rongchii/April 18 (TYO): Youth Resources and Sports Department, Government of Nagaland, aser Nagaland Football Association na longjemer 2buba Nagaland Women Futsal League 2026 May 11 nungi 16 tashi I.G Stadium, Kohima nung ayongzüka asayatsü.

Iba league ya koda asayatsü aser takok ngua asayatsü asoshi sensak asemstü atema Department aser Nagaland Football Association nungi ketdangsürtem April 17 nü coordination senden ka ayongzüka menogo.

Iba league ya iba asaya nung tetsürtem tali shilem agidaktsütsü aser state nung futsal asayatsü janrarterem nem sabang ka agütsütsü nükjidong nung ayongzüko.

League nung ajak senteper

senpet sen 2,00,000 agütsütsü telemteba agiogo, kong Best Player, Best Defender, Best Goalkeeper aser tanga jurila senpettem densema alitsü.

League lapokba sentong ya May 11 nü I.G Stadium, Kohima nung agitsü. Taküm iba league nung team 10 dang asayadaktsütsü, aser mezüng züngoksemertem nem tama maongka agütsütsü. Team shia nung tajemba agi asaya 7 aser timba agi asayar 10 alitsüla, aser asayar den Team Manager aser Coach kaka alitsü nüngdaker.

League nung asayatsü atema club temi item criteria tem ya ajangettetsüla.

Club ya pai District Football Association (DFA) nung züngoksema alitsü nüngdaker. Pai tata DFA nungi No Objection Certificate (NOC)

agizüktsüla. Team shia nung Nagaland nungi lisopur shilem 60 alitsüla.

Iba asayamung nung shilem agirtem nem I.G Stadium, Kohima nung tanendak aser chiyongtsü agütsütsü. Asayamung dak sendakba nung advertisement aser registration osang tejangja mapang tatsüka tsüngda metetdaktsütsü, ta ketdangsürtem i metetdaktsüogo.

Kasa mapang nung Department-i temsüa aliba club ajak dang takaratiba nung züngoksemstü aser Nagaland nung tetsür football asaya tashi itshidaktsütsü atema iba nung ya shilem agitsü ayongzüko.

Osang tejangjaba agitsü atema item number; 8974716323/9366833755 nung office mapang tongteprateptsü metetdaktsüogo.

Sunrisers Hyderabad-i Payne mele Gerald alizükogo



Gerald Coetzee

Rongchii/April 18, 2026 (Agencies): IPL 2026 nung tanungba asayatem atema Sunrisers Hyderabad puri David Payne melena Gerald Coetzee alizükogo. Payne ya yiruba ajanga masayatetsüsa akümiba sülen SRH-i Honibarnü iba osang ya sangdonga liasü. Left-arm pacer ya tang asaya aliba season nung asaya ana nung asaya aser iba mapang wicket ana agia liasü.

"TATA Indian Premier League (IPL) 2026 nung tanungba asayatem atema Sunrisers Hyderabad (SRH) puri David Payne melena Gerald Coetzee shimogo. Payne shibai tang asaya aliba IPL nung SRH nungi asaya ana asayaba

mapang wicket ana agiogo, pa yiruba sülen season tepeyong masayatetsüsa kümogo," ta league-i sangdong ka ajanga metetdaktsü.

Coetzee ya right-arm fast bowler ka lir aser pai international jenjang nung asayaba tajangshiba aika bena lir. Pa South Africa national cricket team nungi format balala nung asayaogo. Arishi küm 25 tain asayar shiba Test pezü, ODI 14 aser T20I 18 nung asayar lir, pai tang tashi nung wicket 67 agir lir.

Pa taküm IPL auction nung shingaija mali, saka pa taoba mapang IPL nung Mumbai Indians aser Gujarat Titans nungi asayaogo aser iba mapang pai asaya 14 nung wicket 15 agir lir.

Arishi küm 25 tain asayar ya T20 World Cup mapang South Africa indang squad nung liasü, saka masayashi. Asayamung tembangba sülen pa New Zealand den T20 asaya pongu asayaogo. Pa SHR nung crore 2 agi adentsü.

Kasa mapang nung captain Pat Cummins team nung denshiba ajanga SRH pur tashi itshidaktsüogo, shiba April 17 nü squad nung denogo aser April 25 nü Rajasthan Royals den asaya nungi tenzüka asayatsü imlar. SRH pur tang point table nung pongububa nung lir.

Coetzee ya ball kanga kar aonba ajanga nüngtugu lir, aser pa adenba ajanga SRH bowling unit akangshitsütsü.

Bangladesh den Test asaya atema Sarfaraz coach asütsü shimogo

Rongchii/April 18, 2026 (Agencies): Bangladesh den Test asayamung atema Pakistan-i asayar 16 shimogo. Iba team ya Shan Masood lenisüba nung asayatsü. Kasa mapang nung iba asayamung atema taoba Pak team captain Sarfaraz Ahmed head coach asütsü shimogo aser pa den Asad Shafiq batting coach aser Umar Gul bowling coach asütsü.

Pakistan team ya tang ICC World Test Championship nung parnok jenjang yanglushitsü merangba mapang ka lir. Parnok tang pongububa nung lir aser Bangladesh team tibuba nung lir. Test ana asayatsü aliba asayamung ya May 8 nü tenzütsü.

Team shimba dak sendakba ajaki kanga bulua jembiba kaji international jenjang nung Test ka danga masayai aliba asayar pezü; Abdullah Fazal, Amad Butt, Azan Awais, aser Ghazi Ghorri nung team nung aniocka ya lir.

Domestic asayamungtem nung kanga junga asayaba sülen Fazal aser Awais na ya team nung züngoksemogo aser Butt ya tajangshiba aika bena aliba all-rounder ka lir. Ghorri ya wicketkeeper-batter ka lir, aser pabo tawa Bangladesh nung ODI asayamung mapang linük

team nungi asayaogo.

Kasa mapang nung Pakistan-i asayar tejen Babar Azam, Mohammad Rizwan, Shaheen Shah Afridi, Noman Ali, Sajid Khan, aser Salman Ali Agha nung ajak shimogo, aser iba ajanga asayar tejen aser tasentem liromedema team ka shimba sayur.

Iba asayamung atema renemtsü asoshi Pakistan Super League nung shilem magiba asayatem Karachi nung April 27 nungi May 1 tashi training camp ka nung shilem agitsü. Squad den külemi Pakistan Cricket Board-isa, coaching team tasen ka sangdongogo.

Mezüngbuba Test asaya ya May 8 nungi 12 tashi Sher-e-Bangla National Cricket Stadium nung asayatsü aser iba sülen tanabuba Test ya may 16 nungi 20 tashi Sylhet International Cricket Stadium nung asayatsü.

Bangladesh den Test asayamung atema Pakistan squad: Shan Masood (captain), Abdullah Fazal, Amad Butt, Azan Awais, Babar Azam, Hasan Ali, Imam-ul-Haq, Khuram Shahzad, Mohammad Abbas, Mohammad Rizwan, Ghazi Ghorri, Noman Ali, Sajid Khan, Salman Ali Agha, Saud Shakeel aser Shaheen Shah Afridi.

S-Iran sensaksem atema army... (TAPAK 7 NUNGI...)

Pakistan nung taruba anogo ishika tsüngda semsaksem maneni agitsü imla aliba mapang US-Iran ya yimjung atema tenangzüktepba ka yangludaktsütsü asoshi Islamabad-i kidanger aser alima nung lenirtem den tongtepratepa aruba mapang Iran-i Strait of Hormuz-i lapoktsüba sülen ghonda ishika dang lir maneni tenokdangba agütsüba ajanga linük ana tsüngda tenangzüktepba ka yanglutsü asoshi nongshiba tali kümogo. Iba tongtibang tzülenmang lapoktsü atema nangzüktepba ama US-i minyakba atema Tehran-i parnok aija liasü.

Donald Trump-i, Iran den sensaksem tanabuba shilem ya taruba anogo ishika tsüngda Pakistan nung agitsü akok ta shiogo. New York Post sangdong ka ajanga ashiba agi, Trump-i Munir nem tenüngsang agütsü aser pai mapang tajung inyakdar ta ashi.

Islamabad nungi Al Jazeera osangbener Kamal Hyder-i ashiba agi, taruba anogo ishika tsüngda US-Iran sensaksem

atema renemba mapang Munir ya Homibarnü Pakistan tongogo.

"Trump administration-i social media ajanga Pakistan nung lenirtem nem tenüngsang agütsüba asenoki nguogo. Anungji ajaki Islamabad dak rangloker lir. Tebilemba meputepba aika lir, saka diplomatic inyakyim aika benoka inyakdar aser tenangzüktepba langkabosa yanglutsü timla lir," ta pai ashi.

Kasa mapang nung Egypt Foreign Minister Badr Abdelatty-i sangdong ka ajanga Honibarnü ashiba agi, U.S. aser Iran na tsüngda teti atema yimjung ka benoktsü atema Egypt-i Pakistan den sendaktepa inyakdar.

Paisa, rara tamajungba kuma meyoktsü aser Gulf state tem kümüka ayutsü aser energy markets, supply chains aser food security manokshidaktsütsü atema rara sülen security dak sendakba nung jenjang balala agitsü atema Egypt, Turkey, Pakistan aser Saudi Arabia nung ajak longjemer inyakdar, ta shisem.

BILEMDANGANG

"Nai langka-ka kanga inyaknera nai lenmang ngutettsü."